

CUSSEGL GROND

Sessiun da zercladur 2023

Incumbensa Adank concernent meds legals efficazis cunter la criminalitad liada a l'acquisiziun da drogas

En la resposta a la dumonda da la fracziun da la PPS concernent «la criminalitad liada a l'acquisiziun da drogas en la regiun da Cuira» explitga la Regenza, che la situaziun sin il territori da la citad da Cuira na saja betg sa pegiurada e che la scena en il Stadtpark saja dapi 2 onns stabila sin in aut nivel. Questa explicaziun stat en in ferm cuncontrast cun las comunicaziuns da la Polizia chantunala, da l'Uniun per l'agid da survivenza sco er da la citad da Cuira.

Las cifras en il reporting «scena da drogas» da la citad da Cuira demussan cler e net: En cumparegliaziun cun l'onni avant èn tant las acziuns da la Polizia da la citad sin annunzia sco er il dumber da las squittas chattadas sa quadruplads, il dumber da persunas senza domicil fix è sa dublegià ed il dumber da persunas en il Stadtgarten è s'augmentà durant questa perioda per var 20 fin 30 pertschient tenor las indicaziuns da l'Uniun per l'agid da survivenza. Questas cifras vegnan consegnadas mintga mais al chantun.

Tenor la comunicaziun a las medias dal chantun e tenor la preschentaziun da la Polizia chantunala davart la statistica da criminalitad 2022 dals 17 da mars 2023 ha l'augment dals delicts tar ils acts chastiabels oravant tut in connex cun la criminalitad liada a l'acquisiziun da drogas da la scena da drogas da Cuira creschenta, che «finanzieschia il consum sur delicts». Tenor l'explicaziun d'ina persuna responsabla da la Polizia chantunala fetschian singulas persunas ord la scena da drogas donn a 40 fin 50 persunas, fin ch'insatge capitia. La Polizia chantunala fiss zunt cuntenta, sche la lescha permettess dapli meds legals.

I sto vegnir remartgà, che tant persunas spezialisadas sco er persunas pertutgadas (anteriuramain) fan attent, ch'i resultan tutttavia schanzas per las persunas cun ina dependenza da drogas, sch'ellas ston plitost pli baud che pli tard entrar en l'execuziun da chastis. Quai las dat ina pausa che po adina puspè vegnir nizzegiada per sortir dal circol viziuz da la dependenza.

Las sutsegnadras ed ils sutsegnaders incumbenseschan la Regenza da rinforzar cleramain las mesiras cunter la criminalitad liada a l'acquisiziun da drogas da la scena da drogas. Quai duai succeder d'ina vart cun trair a niz il meglier pussaivel il rom legal existent. Da l'autra vart duai la Regenza proponer eventualas adattaziuns necessarias da leschas per metter a disposiziun a las autoritads da persecuziun penala dapli meds legals.

Claustra, ils 15 da zercladur 2023

Adank, Degiacomi, Cramer, Bärtsch, Berweger, Bisculm Jörg, Brandenburger, Bundi, Butzerin, Candrian, Casutt, Cola Casaulta, Cortesi, Della Cà, Dietrich, Dürler, Favre Accola, Föhn, Furger, Gansner, Gort, Grass, Heini, Hoch, Hohl, Hug, Kappeler, Koch, Krättli, Lehner, Maissen, Menghini-Inauen, Metzger, Morf, Natter, Oesch, Rauch, Rettich, Righetti, Roffler, Sgier, Stocker, Thür-Suter, von Ballmoos, Walsler